

PEMBENTUKAN KEPENDEKAN KATA NAMA MELAYU

(The Formation of Malay Names Truncation)

Sharifah Raihan Syed Jaafar

s_raihan@ukm.edu.my

Pusat Bahasa dan Linguistik,
Fakulti Sains Sosial dan Kemanusiaan,
Universiti Kebangsaan Malaysia,
40360 Bangi, Selangor Darul Ehsan, Malaysia.
Tel.: +603-89216540

Abstrak

Makalah ini membincangkan proses morfologi pemendekan kata nama khas Melayu. Kajian ini menggunakan data primer yang dikutip daripada pemerhatian yang dilakukan di sekitar Pusat Pengajian Bahasa dan Linguistik dan juga menerusi laman sosial Facebook. Nama khas yang diperoleh terdiri daripada nama khas dalam kalangan pelajar. Penelitian berfokus kepada proses pembentukan kata nama pendek yang terhasil daripada kata nama penuh. Analisis dilakukan untuk meneliti proses pembentukan pemendekan kata nama Melayu berdasarkan pendekatan yang dikenali sebagai templat berdasarkan morfem dalam teori prosodi morfologi yang telah dibangunkan dalam teori optimaliti. Dapatan daripada analisis ini dapat menjelaskan bagaimana proses pemendekan disilabik dan monosilabik berlaku dalam bahasa Melayu.

Kata kunci: Melayu, pemendekan kata nama, prosodi morfologi, templat berdasarkan morfem, optimaliti

Abstract

This paper discusses the morphological process of truncation in Malay names. This study uses primary data collected from observations made at the School of Language Studies and Linguistics as well as through the social networking site, Facebook. The names

were gathered from students of this school. The research focuses on the process of truncation of full names. The analysis was conducted to investigate the truncation of names based on the approach in prosodic morphology theory called morpheme-based template, which has been developed within the optimality theory. The results of this analysis could explain how the process of disyllabic and monosyllabic truncations occur in Malay.

Keywords: Malay, names truncation, prosodic morphology, morpheme-based-template, optimality

PENDAHULUAN

Proses pemendekan berlaku apabila sesuatu kata kehilangan atau mengalami pengguguran pada segmen atau suku katanya. Terdapat pelbagai bentuk pemendekan kata nama. Antara bentuk pemendekan kata nama termasuklah pemendekan kata nama yang tidak berasaskan nama asal sebaliknya berdasarkan sifat yang ada pada diri mereka. Misalnya, panggilan berdasarkan fizikal, sifat, dan perangai seperti “panjang” bagi mereka yang tinggi, “black” bagi mereka yang berkulit gelap, dan sebagainya. Selain itu, terdapat juga panggilan kata nama yang berasaskan panggilan dalam keluarga, atau juga dipanggil sebagai “panggilan kekeluargaan”. Contohnya:

Kata Panggilan	Bentuk Pemendekan
Ayah	yah
Emak	mak
Abang	bang

Kajian pembentukan pemendekan kata nama bahasa Melayu (BM) belum mendapat perhatian yang sewajarnya daripada ahli linguistik formal seperti fonologi, morfologi atau semantik. Dengan maksud lain, proses pembentukan kata nama yang dipendekkan dalam sistem panggilan Melayu masih belum menerima penjelasan teoretis daripada mana-mana cabang bidang linguistik. BM juga memperlihatkan kerencaman dalam kata yang terbentuk daripada proses pemendekan. Melalui pemerhatian pengkaji, terdapat kata nama yang menggugurkan suku kata pertama seperti /hartini/ menjadi [tini] dan /ainura/ menjadi [nura]. Ada juga yang

menggugurkan suku kata akhirnya seperti kata nama /maherah/ kepada [mahe]. Selain itu, terdapat juga pemendekan yang hanya melibatkan pengguguran segmen, peleburan vokal, dan sebagainya.

Salah satu perkara yang dilihat agak merumitkan apabila terdapat kata nama yang mempunyai lebih daripada satu bentuk kependekan. Contohnya, kata nama /majitah/ yang mempunyai dua bentuk pemendekan, iaitu [majī] dan [jitah]. Kedua-dua bentuk pendek ini mempunyai struktur suku kata yang berbeza, iaitu KVKV dan KVKVK. Bentuk pendek [majī] diambil daripada suku kata pertama daripada kata nama penuhnya, manakala [jitah] diambil daripada suku kata kedua dan ketiga. Begitu juga dengan kata nama /amira/ yang mempunyai lebih daripada satu kependekan, iaitu [mira], [ira], dan [emi], yang lebih kompleks berbanding kata nama /majitah/. Walau bagaimanapun, hal ini di luar skop kajian ini. Posisi suku kata manakah pada kata dasar pemendekan itu terbentuk bukan merupakan isu perbincangan dalam kajian ini. Sebaliknya, bentuk pendek atau output yang terhasil daripada pemendekan itulah yang diberikan keutamaan dalam kajian ini.

KAJIAN LEPAS

Kajian pemendekan kata nama telah banyak dilaksanakan oleh pengkaji luar yang menggunakan pelbagai jenis data dan pendekatan seperti prosodi morfologi dan teori optimaliti. Antara kajian lepas yang menggunakan teori prosodi morfologi termasuklah: Lipski (1995), Avram (2010) dan Cohn (2003). Lipski (1995) melihat fenomena pemendekan kata nama dalam bahasa Sepanyol. Menurut Lipski, bahasa Sepanyol mempunyai dua jenis kata nama panggilan. Pertama, nama yang diberi mengikut ciri-ciri atau sifat seseorang itu yang tidak ada kaitan dengan nama sebenar. Kedua, nama hipokoristik yang terbentuk daripada proses fonologi termasuklah pemendekan, pengulangan dan epentesis. Salah satu jenis hipokoristik dalam bahasa Sepanyol adalah seperti Robertito dan Albertito yang dipendekkan menjadi Tito. Kajian beliau menerangkan mengenai nama-nama yang melibatkan proses fonologi dalam pemendekannya, seperti nama Crisóstomo menjadi Choto, Lázaro menjadi Lacho, dan Aristóbulo menjadi Tobo. Semua pemendekan kata nama ini terbentuk dengan mengambil konsonan onsets dan digabungkan dengan rima suku kata terakhir nama tersebut. Terdapat juga nama singkatan yang terbentuk daripada gabungan suku kata yang mengalami tekanan (*stressed syllable*)

dengan suku kata terakhir, contohnya nama Cándida menjadi Canda. Singkatan seperti ini lebih mudah berbanding dengan proses yang disebutkan sebelum ini. Terdapat satu fenomena dalam bahasa Sepanyol ini yang menarik minat penulis, iaitu pemendekan seperti nama Rodolfo menjadi Fofó. Pemendekan ini tidak dianggap sebagai pengulangan suku kata akhir, tetapi disebut sebagai “pemudahan”. Proses ini dapat dilihat sebagai Rofo à Fofó. Segmen /r/ yang pertama digugurkan manakala segmen /f/ di awal itu dikatakan disebut secara automatik kerana mematuhi templat bahasa tersebut, bukan satu pengulangan (*reduplication*) daripada /f/ yang kedua.

Avram (2010) pula membincangkan fenomena pemendekan kata nama dalam bahasa Jepun dan bahasa Inggeris. Kajian beliau memaparkan pemendekan nama Jepun yang banyak. Kajian beliau terbahagi kepada empat bahagian yang dipecahkan lagi kepada cara-cara pemendekan nama yang pelbagai. Antaranya termasuklah nama perempuan desa, nama keluarga, dan pelanggan geisha atau bar. Pemendekan nama dalam bahasa Jepun menunjukkan berlakunya penambahan seperti -chan, -kun, dan -san pada awal, akhir atau tengah kata nama. Bagi kata nama dalam bahasa Inggeris pula, pemendekan boleh hadir dalam bentuk monosilabik atau disilabik. Pemendekan dalam bahasa ini selalunya dimulakan dengan konsonan. Sebagai contoh, nama Joseph menjadi Jo dan Barbara menjadi Barb. Selain itu, fenomena yang terdapat dalam bahasa Inggeris seperti yang dikatakan oleh Avram ialah penggantian segmen-segmen dalam sesuatu kata nama. Contohnya nama Richard dipanggil Dick, bukan Rick dan William dipanggil Bill, bukan Will.

Cohn (2003) membincangkan pemendekan kata nama dalam bahasa Indonesia. Cohn melihat pemendekan kata nama Indonesia ini hanya pada nama-nama bisilabik atau yang mempunyai dua suku kata. Dalam kajiannya, Cohn telah membuktikan kedua-dua hipotesisnya. Salah satu hipotesis beliau ialah nama yang berakhir dengan suku kata terbuka akan menghasilkan pemendekan yang dibentuk daripada KVK pada awal nama atau KV pada suku kata akhir ditambah dengan hentian glotis (KV# + ?) seperti nama Budi, akan menjadi [bud] atau pun [di?] apabila dipendekkan. Seterusnya, apabila kata nama yang bersuku kata tertutup KVK pada akhirnya dipendekkan, KVK tersebut akan menjadi bentuk pendeknya. Contohnya nama Agus akan menjadi Gus. Lain pula halnya dengan bahasa Melayu yang tidak sesuai dengan hipotesis ini seperti nama /abhar/ yang dipendekkan menjadi [baha] dan bukannya [har]. Cohn juga ada menyatakan bahawa kata nama bisilabik akan menjadi

monosilabik apabila dipendekkan. Walaupun bahasa Indonesia dilihat seakan-akan sama seperti BM kerana kedua-dua bahasa ini berada di bawah satu rumpun yang sama, namun sistem kedua-dua bahasa ini tentu ada yang berlainan. Perbezaan ini dapat dilihat pada nama /fazli/ yang dipendekkan menjadi [pali]. Selain tidak bersamaan dengan pendapat Cohn bahawa kata nama bisilabik menjadi monosilabik, hal ini juga tidak boleh disesuaikan dengan hipotesis Cohn yang kedua, iaitu nama /fazli/ menjadi [li] atau [liʔ] seperti dalam bahasa Indonesia. Dengan perbezaan ini, maka pengkaji berminat untuk melihat lebih lanjut sistem pemendekan kata nama Melayu di Malaysia. Oleh itu, difikirkan perlu adanya kajian yang membincangkan proses pemendekan sistem panggilan kata nama Melayu yang menggunakan data bahasa ini sendiri.

Selain teori prosodi morfologi, teori fonologi optimaliti juga telah digunakan oleh beberapa orang pengkaji luar. Antara kajian TO ialah: Alber (2010) dan Junko Ito & Armin Mester (1997). Alber (2010) telah mengulas kependekan kata nama dalam bahasa Itali.

Secara umumnya, pemendekan kata nama dalam bahasa Itali selalu melibatkan pengejalan segmen awal atau segmen yang mempunyai tekanan (*stressed syllable*). Sebagai contoh, kata nama [fránce] yang dipendekkan daripada nama /francésca/ merupakan salah satu daripada kata nama yang mengekalkan segmen awal sesuatu kata nama. Bagi pengejalan segmen yang mempunyai tekanan pula dapat dilihat pada kata nama /eleonóra/ menjadi [Nóra] dan bukan [Eleo].

Dalam kajian ini, pemendekan kata nama Melayu berfokus pada kata nama khas hidup manusia. Kata nama khas mendukung makna rujukan khusus pada sesuatu nama orang, haiwan, benda, perbadanan, undang-undang, bangsa, bahasa, pangkat, dan seumpamanya. Kata nama khas ini pula terbahagi kepada dua lagi kategori, iaitu kata nama khas hidup manusia, kata nama khas hidup bukan manusia, dan kata nama khas tidak hidup (Nik Safiah *et. al.* 2011). Kajian yang dijalankan ini mengenai proses pemendekan yang berlaku dalam kata nama panggilan yang terbentuk daripada nama seseorang. Beberapa perubahan bentuk telah dikenal pasti berlaku dalam pemendekan kata nama Melayu. Perubahan tersebut antaranya; kata nama yang mempunyai tiga suku kata berubah menjadi dua suku kata atau satu suku kata apabila dipendekkan. Terdapat juga kata nama yang tidak mengalami sebarang perubahan dari segi bilangan suku katanya setelah pemendekan berlaku. Perubahan yang berlaku ini akan dibincangkan dengan lebih lanjut pada bahagian analisis.

DATA DAN KAEDAH KAJIAN

Data untuk kajian ini telah diperoleh melalui dua cara, iaitu: pemerhatian sekitar dan juga pemerhatian dalam talian. Melalui pemerhatian sekitar, kata nama khas manusia dikumpul daripada kalangan pelajar yang telah dipilih.¹ Selain pemerhatian sekitar, data kata nama panggilan ini juga diperoleh secara dalam talian, iaitu dalam laman sosial Facebook. Pemilihan kata nama panggilan ini tidak dilakukan secara rawak, sebaliknya nama-nama daripada kalangan rakan rapat dan dikenali sahaja yang dipilih. Hal ini supaya nama penuh seseorang yang dipilih itu dapat dipastikan dan tidak hanya berpandukan kepada tekaan sahaja.

Setelah data selesai dikumpulkan, data tersebut dikategorikan mengikut bentuk dan corak pemendekannya. Terdapat dua kategori pemendekan yang telah dikenal pasti, iaitu: (a) pemendekan disilabik dan (b) pemendekan monosilabik. Kedua-dua kumpulan ini pula dibahagikan lagi kepada dua kumpulan kecil berdasarkan saiz inputnya sama ada disilabik atau polisilabik. Keseluruhannya, terdapat empat kategori data. Yang berikut merupakan empat kategori data tersebut.

1. (a) Pemendekan disilabik

(i) Input disilabik

Bentuk Penuh KN

husna
nadzwa
xajrul
fazli
sawfi
sajful
afzan
abhar

Bentuk Pendek KN

nana
wawa
kerol
pali
sopi
epul
atfan
baha

(ii) Input Polisilabik

Bentuk Penuh KN

safwana
ezajana

Bentuk Pendek KN

wana
jana

ƒafikah	pikah
hartini	tini
ƒazwani	wani
asliza	liza
izati	zati
hanida	nida
ƒamila	mila
lijana	jana
ƒazwana	wana

(b) Pemendekan Monosilabik

(i) Input Disilabik

Bentuk Penuh KN

lilis
ƒazwan
jaƒri

Bentuk Pendek KN

lis
wan
jaƒ

(ii) Input Polisilabik

Bentuk Penuh KN

ƒuhada
zulajha
nadija
mastura
sabrina
majsarah
qistina
jusrizal
zajhatun
suraja

Bentuk Pendek KN

ƒu
zu
nad
mas
sab
maj
qis
jus
zaj
su


Daripada keempat-empat kategori kata nama khas manusia di atas yang diperoleh daripada kutipan data yang dilakukan menunjukkan pemendekan kata nama khas manusia dalam BM bersaiz sama ada disilabik

atau monosilabik. Perhatikan tiada kependekan kata nama yang bersaiz lebih besar daripada disilabik. Saiz kependekan kata nama yang terbentuk ini menerbitkan satu persoalan yang berkaitan dengan syarat struktur suku kata yang ditetapkan untuk bahasa Melayu (Farid 1980; Yunus 1980; Teoh 1994 dan Zaharani 2000).

Pembentukan Kependekan Kata Nama dari Perspektif Prosodi Morfologi

Salah satu idea penting yang ditekankan oleh teori ini ialah penjelasan mengenai keperluan saiz minimum perkataan. Dalam pendekatan Templat Berdasarkan Morfem² (atau singkatannya, TBM) yang dibangunkan dalam teori Prosodi Morfologi, setiap perkataan dalam sesuatu bahasa tidak tertakluk pada keperluan saiz minimal yang sama. Pendekatan TBM mencadangkan idea bahawa keperluan saiz morfem prosodi ditentukan oleh kategori morfologi yang dimiliki oleh morfem tersebut, seperti kata akar, kata dasar atau imbuhan (Downing, 2006). Dalam erti kata lain, sebelum menentukan saiz sesuatu morfem prosodi, kita mestilah terlebih dahulu mengenal pasti kategori morfologinya (iaitu sama ada kata akar, kata dasar atau imbuhan). Saiz morfem prosodi kemudiannya ditentukan oleh kategori morfologi yang telah dikenal pasti tadi. Lazimnya, semua imbuhan bersaiz monosilabik, manakala kata dasar yang terdiri daripada kata akar dan imbuhan adalah lebih besar saiznya, iaitu disilabik atau bersuku kata dua. Gambar rajah berikut menunjukkan struktur morfologi binaan kata dasar (iaitu gabungan imbuhan dan kata akar):

2. Struktur Morfologi Kata Dasar





Kata dasar yang mengandungi imbuhan dan kata akar seperti yang ditunjukkan dalam rajah struktur morfologi kata dasar di atas, mestilah memenuhi kekangan yang dipanggil KORELASI MORFEM SUKU KATA yang boleh ditakrifkan secara formal seperti yang berikut:

3. KORELASI MORFEM SUKU KATA (daripada Russell, 1997: 121, dalam Downing, 2006: 120)

Setiap morfem awalan dan kata akar mestilah mengandungi satu suku kata masing-masing.

Kekangan di atas bermaksud awalan mesti mengandungi satu suku kata dan begitu juga kata akar. Secara mudahnya, KORELASI MORFEM SUKU KATA mensyaratkan kedua-dua morfem, iaitu kata akar dan imbuhan mesti mempunyai sekurang-kurangnya satu suku kata setiap satu. Dalam erti kata lain, perkataan yang terbina daripada imbuhan dan kata akar mestilah bersaiz minimum - dua suku kata. Hal ini termaktub dalam keperluan kekangan syarat saiz minimum KORELASI MORFEM SUKU KATA. Saiz minimal dua suku kata bagi gabungan morfem imbuhan dan kata akar yang disyaratkan oleh kekangan KORELASI MORFEM SUKU KATA adalah bersejajaran dengan kekangan KATA DASAR PROSODI kerana kekangan ini juga memformalisasikan keperluan minimal dua suku kata (Downing, 2006: 123):

4. KATA DASAR PROSODI MINIMAL (Downing, 2006: 124)



Dalam pendekatan templat berdasarkan morfem (TBM), jika sesuatu perkataan tidak mempunyai saiz minimum dua suku kata, maka perkataan tersebut mestilah memenuhi prinsip minimaliti binari pencabangan perkataan (*the principle of binary minimality of branching words*). Prinsip pencabangan ini diformalisasikan oleh kekangan kebertandaan yang dinamakan CABANG KEPALA (*HEAD BRANCH*) seperti dalam (5), dan PENCABANGAN PROSODI (*PROSODIC BRANCHING*) seperti dalam (6) (Downing, 2006:122) di bawah:

5. CABANG KEPALA

Kepala leksikal (akar) mencabang secara prosodi.


6. PENCABANGAN PROSODI

Satu konstituen mempunyai cabang sekiranya konstituen tersebut atau anaknya mengandungi lebih daripada satu.


TBM mencadangkan mana-mana perkataan yang tidak memenuhi keperluan minimaliti saiz perkataan yang disyaratkan oleh bahasanya, maka perkataan tersebut perlulah memenuhi salah satu daripada representasi KEPALA (akar), seperti yang ditunjukkan dalam representasi KEPALA dalam (7) di bawah. KEPALA dalam (7a) dan (7b) masing-masing mengandungi dua suku kata dan dua mora sebagai anak. KEPALA dalam representasi (7c) pula menguasai mora dengan dua anak. Kesesuaian KEPALA dalam sesebuah bahasa adalah berbeza-beza daripada satu bahasa dengan bahasa yang lain. Dengan memenuhi salah satu daripada representasi KEPALA dalam (7) seperti yang dicadangkan dalam pendekatan TBM ini mampu memberikan penjelasan bagi perkataan yang tidak memenuhi syarat suku kata minimal yang dikehendaki oleh bahasa masing-masing.

7. Representasi KEPALA (Akar) (Downing, 2006: 123)


a) KEPALA



b) KEPALA




c) KEPALA



Seperti dalam rajah KATA DASAR PROSODI MINIMAL (4) di atas, kata dasar dibina daripada perkataan yang diperoleh hasil gabungan imbuhan dengan kata akar. Dalam teori ini, pemendekan perkataan dijelaskan sebagai satu bentuk perkataan terbitan (*derived words*) yang terhasil daripada proses morfologi sepertimana imbuhan dan penggandaan. Tidak seperti imbuhan, kata dasar diperoleh daripada gabungan imbuhan dan kata akar, sebaliknya pemendekan perkataan pula diperoleh daripada kata dasar (iaitu bentuk penuhnya) dengan bentuk pendeknya. Rajah di

bawah ini menunjukkan representasi struktur kata dasar yang terhasil daripada proses pemendekan perkataan:

8. Representasi Pemendekan Kata Dasar



Dalam representasi di atas, kata dasar terdiri daripada dua morfem, iaitu kata akar dan bentuk pendeknya. Kedua-dua morfem yang terbina daripada proses pemendekan ini mestilah bersaiz disilabik secara minimum, iaitu satu suku kata untuk setiap morfem. Teori ini meramalkan bahawa output yang terhasil daripada pemendekan juga harus secara minimum bersuku kata dua, sama seperti imbuhan. Dengan pencabangan struktur morfologi seperti ini, pemendekan kata nama yang bersuku kata dua dijelaskan sebagai Kata Dasar Prosodi (*Prosodic Stem*). Saiz minimum pemendekan kata nama ini diformalisasikan oleh kekangan yang dipanggil Pemendekan= Kata Dasar Prosodi, seperti yang ditakrifkan di bawah:

9. Pemendekan= Kata Dasar Prosodi

Pemendekan Kata Dasar Dijelaskan sebagai Kata Dasar Prosodi

Dalam kebanyakan bahasa, bentuk pendek kata nama adalah bersaiz disilabik dan ini memenuhi keperluan syarat Kata Dasar Prosodi. Antara bahasa yang bersaiz disilabik sebagai bentuk pendek bagi kata nama mereka ialah bahasa Jerman, seperti di bawah.

10. Pemendekan Kata Nama Jerman (Ito dan Mester, 1997)

Perhatikan kata nama dalam bahasa Jerman seperti dalam jadual. Perkataan dalam bahasa ini mestilah sekurang-kurangnya bersaiz disilabik. Oleh sebab itu bentuk pendek kata namanya adalah disilabik, tanpa mengira saiz pada bentuk penuh kata nama tersebut. Untuk kes bahasa Jerman ini, kekangan Pemendekan= Kata Dasar Prosodi secara langsung dipatuhi dan

Bentuk Penuh	Bentuk Pendek
Gabriele	Gabi
Waldemar	Waldi
Wilhelm	Willi
Trabant	Trabi
Gorbatschow	Gorbi
Oliver	Olli

kekangan ini secara teorinya perlu menduduki pada hierarki paling tinggi. Hal yang berlaku dalam bahasa Jerman ini juga hampir sama seperti dalam kependekan kata nama Melayu. Merujuk data yang diperoleh dalam (1), input bagi kata nama yang bersaiz polisilabik dan disilabik berubah menjadi disilabik sebagai bentuk pendeknya. Hal ini bermakna, kekangan Pemendekan= Kata Dasar Prosodi juga dipatuhi oleh data bagi kata nama Melayu.

Untuk menjelaskan bentuk pendek kata nama Melayu yang tidak sama dengan bentuk penuhnya, pendekatan TBM mencadangkan satu kekangan antikesetiaan. Untuk menangani kes begini, kekangan antikesetiaan iaitu DASAR≠KEPENDEKAN mensyaratkan bentuk pendek sesuatu kata nama itu tidak boleh sama dengan bentuk penuhnya. Dengan mentatatingkatkan kekangan antikesetiaan ini lebih tinggi daripada kekangan Pemendekan= Kata Dasar Prosodi, output bagi kata nama itu tidak akan sama dengan bentuk penuhnya (bentuk dasar). Kependekan kata nama disilabik yang mengalami proses pemendekan daripada kata dasar (bentuk penuh) polisilabik, seperti dalam 1a (ii), secara jelasnya mematuhi kekangan antikesetiaan ini, DASAR≠KEPENDEKAN. Begitu juga dengan kependekan kata nama monosilabik yang terhasil daripada kata nama dasar yang bersaiz disilabik dan polisilabik, seperti dalam 1b (i) dan (ii). Kata nama yang berinput disilabik juga walaupun mengambil disilabik sebagai bentuk pendeknya, iaitu dengan sedikit perubahan, tetapi masih tidak sama dengan bentuk penuhnya, seperti yang telah dinyatakan di atas, tetapi dianggap sebagai mematuhi kekangan DASAR≠KEPENDEKAN.

Pematuhan pada kekangan DASAR≠KEPENDEKAN dalam proses pembentukan pemendekan kata nama Melayu adalah tinggi kerana bentuk pendek kata nama yang terhasil dalam bahasa ini adalah berbeza dengan bentuk dasarnya. Mengambil kira hal ini, kekangan antikesetiaan yang dicadangkan oleh TBM yang memainkan peranan

penting dalam memastikan bentuk pendek kata nama yang terhasil tidak sama dengan bentuk dasarnya, maka kekangan antikesetiaan ini perlu mendominasi kekangan yang lain dalam hierarki tatatingkat kekangan bahasa ini. Yang berikut ditunjukkan interaksi dua kekangan, iaitu DASAR≠KEPENDEKAN >> Pemendekan= KD Prosodi menilai kependekan kata nama disilabik [wana] dan [sopi] daripada input atau bentuk penuhnya polisilabik, /fazwana/ dan /sawfi/.

11. Interaksi kekangan DASAR≠KEPENDEKAN >> Pemendekan= KD Prosodi

/fazwana-BPendek/	DASAR≠KEPENDEKAN	Pemendekan= KD Prosodi
a. $\text{fazwana} - \text{wana}_{\text{Stem}}$		
b. $\text{fazwana} - \text{fazwana}_{\text{Stem}}$	*!	
/saufi-BPendek/		
d. $\text{saufi} - \text{sopi}_{\text{Stem}}$		
e. $\text{saufi} - \text{saufi}_{\text{Stem}}$	*!	

Dalam analisis jadual di atas, tatatingkat dua kekangan ini menghasilkan output disilabik sebagai bentuk pendek kata nama /fazwana/ dan /saufi/. Tatatingkat kekangan di atas juga meramalkan tidak ada output yang terhasil sama seperti bentuk dasar kata nama tersebut. Sebagaimana yang diillustrasikan dalam jadual di atas, nyatanya calon (b) dan (e) tersingkir kerana bentuk pendek kata nama yang terhasil adalah sama dengan bentuk penuhnya. Kesamaan inilah menyebabkan calon (b) dan (e) tersingkir walaupun bentuk pendeknya mengandungi sekurang-kurangnya dua suku kata, seperti yang dikehendaki oleh kekangan Pemendekan= KD Prosodi. Dengan ini, calon (a) dan (d) adalah optimal.

Di samping pemendekan disilabik seperti di atas, kata nama berinput polisilabik juga menghasilkan bentuk output bersaiz monosilabik. Seperti yang dipaparkan dalam 1b(ii), kata nama seperti /sabrina/, /mastura/ dan /qistina/ muncul sebagai [sab], [mas] dan [qis] sebagai bentuk pendeknya. Pemendekan monosilabik yang berlaku ini memerlukan justifikasi fonologi tentang bagaimana kata nama yang bersaiz monosilabik muncul sebagai bentuk pendek sedangkan saiz disilabik telah disyaratkan sebagai keperluan minimal perkataan dalam bahasa ini (Farid, 1980; Yunus, 1980;

Teoh, 1994 dan Zaharani, 2000). Kemunculan bentuk pendek ini juga sekali gus menimbulkan persoalan mengenai sistem nahu bahasa Melayu berkenaan dengan saiz minimal perkataan. Bagi menangani masalah keperluan saiz minimal perkataan yang muncul dalam proses pemendekan kata nama Melayu, makalah ini turut memberikan penjelasannya dari sudut teoretis TBM. Proses pemendekan dalam kebanyakan bahasa adalah bersaiz disilabik seperti bahasa Jepun (Ito, 1990: 219), Swahili (Batibo & Rottland, 1992), Itali (Thornton, 1996), Jerman (Ito & Mester, 1997:119) dan banyak lagi. Kependekan kata nama disilabik yang dimiliki oleh bahasa-bahasa tersebut secara teorinya mematuhi keperluan syarat KATA DASAR PROSODI, seperti yang didefinisikan dalam (4). Namun begitu, terdapat juga beberapa bahasa, disilabik bukan merupakan saiz minimum bagi kependekan kata nama dalam bahasa mereka, sebaliknya saiz monosilabik ialah bentuk kependekan yang wujud. Bahasa yang termasuk dalam kes ini contohnya kependekan nama Inggeris dan kata nama panggilan ibu bapa dalam bahasa Thai (Weeda, 1992).

12. Kependekan monosilabik kata nama Inggeris (Downing, 2006)

Nama Penuh	Nama Pendek
David	Dave
Joseph	Joe
Susan	Sue
Nancy	Nance

13. Kependekan Panggilan ibu bapa dalam bahasa Thai (Weeda, 1992)

Bentuk Penuh	Bentuk Pendek (panggilan)
pri:ya:	pri/ya:
salin	lin
narut	rut
petcarat	pet/rat


Contoh-contoh kata nama Inggeris dan kata nama panggilan untuk ibu bapa dalam bahasa Thai menunjukkan proses pemendekan kata nama juga boleh wujud dalam bentuk yang lebih kecil saiznya daripada saiz minimum perkataan, iaitu satu suku kata. Weeda (1992:1) dalam analisisnya menegaskan sekiranya definisi proses pemendekan, iaitu sebahagian perkataan itu digugurkan untuk membentuk perkataan baharu diteliti

semula, maka munasabahlah perkataan tersebut yang kebanyakan bentuk penuhnya terdiri daripada dua suku kata mengambil monosilabik sebagai bentuk pendeknya. Menurutnya lagi, suku kata tunggal (monosilabik) dengan itu merupakan saiz yang optimal (minimal) untuk bentuk pendek perkataan tersebut.


Dalam pendekatan TBM, kes-kes begini boleh digeneralisasikan sebagai, morfem bebas monosilabik ialah jenis binaan kata yang kukuh yang dinamakan sebagai akar prosodi (*prosodic root*). Perbezaan antara kependekan disilabik dan monosilabik adalah berdasarkan huraian prosodinya. Kependekan disilabik dihuraikan sebagai dasar prosodi (*prosodic stem*) sebagaimana yang dijelaskan oleh pencabangan struktur morfologinya, manakala kependekan monosilabik atau disebut sebagai akar prosodi dihuraikan sebagai suatu unit prosodi-morfologi minimal yang boleh menentukan kata leksikal. Kedua-dua unit morfologi ini, iaitu: (1) Dasar Prosodi dan (2) Akar Prosodi direpresentasikan seperti dalam 14(a) dan 14(b) di bawah. Apabila kekangan 14(c) ditatatingkatkan lebih tinggi, maka representasi 14(a) adalah bentuk optimal yang diperoleh, manakala kekangan 14(d) memilih representasi 14(b) sebagai bentuk optimal.

14. Representasi Dasar Prosodi dan Akar Prosodi

a) Huraian Prosodi KD



b) Huraian Prosodi KA



(c) Bentuk Pendek=KD PROSODI: Kependekan KD dihuraikan sebagai KD Prosodi

(d) Bentuk Pendek=KA PROSODI: Kependekan KD dihuraikan sebagai KA Prosodi

Penjelasan pendekatan TBM yang mempertimbangkan kemunculan saiz perkataan yang tidak minimal yang wujud hasil daripada proses pemendekan dapat membantu menjawab isu kewujudan bentuk pendek satu suku kata (monosilabik) dalam kata nama khas Melayu.

Selain kekangan di atas, satu lagi kekangan yang penting dalam analisis ini ialah kekangan kesetiaan MAX-BT. Oleh sebab output bagi bentuk pendek kata nama akan menggugurkan beberapa segmen daripada inputnya, maka pengingkaran pada MAX-BT berlaku. Kekangan MAX-BT boleh didefinisikan seperti yang berikut:

MAX-BT

Segmen dalam kata dasar mesti mempunyai korespondennya dalam bentuk pendeknya (*truncation*).

Yang berikut diaplikasikan pendekatan TBM dalam analisis kata nama bersaiz polisilabik dan disilabik, iaitu /sabrina/ dan /lilis/ yang mengambil saiz monosilabik - [sab] dan [lis] sebagai bentuk pendeknya.

/sabrina-BP/	DASAR≠ KEPENDEKAN	KORELASI MORFEM SUKU KATA	BP=KD Prosodi	BP=KA Prosodi	MAX- BT
a. \varnothing sabrina-sab _{AKAR}			*		****
b. sabrina-sabrina _{AKAR}	*!	*	*		
c. sabrina-rina _{AKAR}		*!			***
/lilis-BP/					
d. \varnothing lilis-lis _{AKAR}					**
e. lilis-lilis _{AKAR}	*!	*	*		

Calon (a) di atas adalah optimal bagi kata nama /sabrina/ kerana ia mematuhi kekangan-kekangan yang berada di tatatingkat tinggi yang menghuraikan bentuk pendek dalam calon ini sebagai pencabangan akar (*branching root*) yang bersaiz monosilabik. Sebaliknya calon (b) tidak optimal, kerana mengambil bentuk penuh kata nama /sabrina/ sebagai bentuk pendeknya. Persamaan bentuk pendek dengan bentuk penuh kata nama ini menyebabkan calon (b) ingkar kekangan DASAR≠KEPENDEKAN. Calon (c) juga bukan merupakan calon optimal kerana mengingkari korelasi morfem suku kata, iaitu kekangan yang menghendaki morfem seperti akar prosodi mempunyai saiz kecil yang optimal (*simplex morpheme*), iaitu satu suku kata. Set yang kedua menunjukkan calon monosilabik (d) juga adalah optimal bagi kata nama

bersaiz disilabik -/lilis/. Calon (e) yang bentuk pendeknya bersaiz disilabik sebaliknya bukan merupakan calon optimal kerana mengingkari kekangan di tatingkat tinggi yang menghendaki bentuk pendek sesuatu kata nama berbeza daripada bentuk penuhnya.

KESIMPULAN

Analisis ini mendapati bahawa bentuk pendek bagi kata nama Melayu terdiri daripada saiz disilabik dan monosilabik. Kedua-dua bentuk pendek ini terbina daripada bentuk penuhnya yang bersaiz disilabik dan polisilabik. Penjelasan teoretikal yang berdasarkan kepada pendekatan templat berdasarkan morfem dalam teori prosodi morfologi yang dibangunkan dalam teori fonologi optimaliti berjaya mengupas kemunculan kedua-dua bentuk pendek yang terhasil daripada proses pembentukan pemendekan kata nama Melayu, terutamanya bentuk/output monosilabik. Penjelasan teoretikal ini secara tidak langsung menjawab persoalan kemunculan output monosilabik yang tidak selari dengan keperluan minimal saiz perkataan dua suku kata yang telah disyaratkan dalam bahasa Melayu oleh penahu lepas. Namun begitu, analisis ini merupakan analisis permulaan mengenai kependekan kata nama Melayu. Analisis lanjutan boleh dilakukan di masa akan datang dengan penggunaan data yang lebih luas dan pengaplikasian teori yang berbeza.

NOTA

- 1 Pemerhatian sekitar ini telah dilakukan di Pusat Pengajian Bahasa dan Linguistik, Universiti Kebangsaan Malaysia. Oleh sebab itu kata nama yang dipilih dalam kajian ini terdiri dalam kalangan pelajar.
- 2 Pendekatan templat berdasarkan morfem atau *morpheme-based template* dalam Prosodi Morfologi yang dibangunkan dalam teori optimaliti.

RUJUKAN

- Alber B., 2010. "An Exploration of Truncation In Italian" dlm. *Rutgers Working Paper in Linguistics* 3, hlm. 1-30. New Brunswick.
- Avram A., "Japanese and English Name Truncations" dlm. *Bucharest Working Papers in Linguistics*, 2010.
- Batibo, H. M, & Rottland, F., "The Minimality Condition in Swahili Word Forms" dlm. *AAP* 29, hlm. 89-110, 1992.

- Cohn, A. 2003. "Truncation in Indonesian and the Minimal Word" dlm. *Papers from ISMIL 7*.
- Downing L. J., 2006. *Canonical Forms in Prosodic Morphology*. Oxford: Oxford University Press.
- Farid M. Onn, 1980. *Aspects of Malay Phonology and Morphology: A Generative Approach*. Bangi: University Kebangsaan Malaysia.
- Lipski J. M., 1995. *Spanish Hypocoristics: Towards A Unified Prosodic Analysis. Hispanic Linguistics*. The Prisma Institute.
- Nik Safiah Karim, Farid Onn, Hashim Haji Musa dan Abdul Hamid Mahmood, 2011. *Tatabahasa Dewan Edisi Ketiga*. Kuala Lumpur: Dewan Bahasa dan Pustaka.
- Ito, Junko, "Prosodic minimality in Japanese" dlm. *Proceedings of CLS 26, ii: Parasession on the Syllable in Phonetics and Phonology*, 213-39, 1990.
- Ito J. & Mester A., 1997. "Sympathy Theory and German Truncations" dlm. B. Moren & V. Miglio (eds). *University of Maryland Working Papers in Linguistics 5*. University of Maryland.
- Teoh Boon Seong, 1994. *The Sound System of Malay Revisited*. Kuala Lumpur: Dewan Bahasa dan Pustaka.
- Thornton, Anna M., "On Some Phenomena of Prosodic Morphology in Italian: Accorciamenti, Hypocoristics and Prosodic Delimitation" dlm. *Probus* 8, hlm. 81-112, 1996.
- Weeda, Donald Stanton, 1992. "*Word Truncation in Prosodic Morphology*". Ph.D Disertasi, University of Texas-Austin.
- Yunus Maris, 1980. *The Malay Sound System*. Kuala Lumpur: Fajar Bakti.
- Zaharani Ahmad, "Penggandaan Separa Bahasa Melayu: Suatu Analisis Aotusegmental" dlm. *Jurnal Dewan Bahasa* 44:7, hlm. 722-36, 2000.